



**Sud Bosne i Hercegovine**  
**Sud Bosne i Hercegovine**

---

Broj: S1 3 IŽ 038429 20 IŽ  
Sarajevo, 29.10.2020. godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo, predsjednika vijeća, Srete Crnjaka i Vesne Trifunović, članova vijeća, odlučujući o žalbi žalitelja Alojzija Katića, Aichfeldgasse 4, 8720 Knittelteld, Austrija, izjavljenoj protiv Odluke Centralne izborne komisije Bosne i Hercegovine broj 05-1-07-1-998/18 od 1.10.2020. godine o odbijanju upisa u izvod iz Centralnog biračkog spiska za glasanje van BiH za Lokalne izbore 2020.godine, u nejavnoj sjednici, održanoj dana 29.10.2020. godine, donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje van BiH za Lokalne izbore 2020. godine za ukupno 27.960 birača po prijavama podnesenim do 1.9.2020. godine, zbog neispunjavanja uslova iz odredbi člana 3.15 stav 1., 2. i 3. Izbornog zakona BiH. U odnosu na žalitelja odbijen je upis iz razloga što je isti registrovan na više različitih adresa.

Protiv ove odluke žalitelj je blagovremeno uložio žalbu u kojoj navodi da je utvrdio da se ne nalazi na spisku glasača za glasanje putem pošte jer je prijavljen na više adresa, te ističe da je njegova tačna adresa Aichfeldgasse 4, 8720 Knittelteld, Austrija.

Centralna izborna komisija Bosne i Hercegovine u odgovoru na žalbu navodi da su za podnositelja žalbe dostavljene dvije prijave u kojima su navedene različite adrese na koje će biti upućen glasački materijal, te da žalitelj nije dostavio potvrdu nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja ožalbene odluke, a prilikom razmatranja prijava dostavljenih za žalitelja, utvrdio da su za žalitelja dostavljene dvije prijave na PRP-1 Obrascu - Prijava za glasanje izvan BiH, te da su u prijavama navedene različite adrese na koje će biti upućen glasački materijal. U konkretnom slučaju u prvoj prijavi je navedena adresa Aichfeldgasse 4, 8720 Knitteltd, Austrija, dok je u prijavi navedena adresa Ljermontova 12/3, 21000 Novi Sad, Srbija.

Nadalje, iz dokaza u spisu proizlazi da je Centralna izborna komisija BiH putem elektronske pošte dana 03.10.2020. godine obavijestila žalitelja da je potrebno da najkasnije do 05.10.2020. godine dostavi dokaz o prebivalištu u Republici Srbiji, što žalitelj u ostavljenom roku nije učinio.

I po shvatanju apelacionog vijeća, druga dostavljena prijava žalitelja Alojzija Katića se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositelj žalbe podnošenjem druge prijave nije ukazao da ima saznanja o podnesenoj prvoj prijavi, kada bi se moglo cijeniti da druga podnesena prijava predstavlja promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositelj žalbe nije Centralnoj izbornoj komisiji BiH dostavio, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovan prava adresa njegovog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA  
S U D I J A

Mirsada Džindo